

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ore te feia e parau mai ia'u ra e, E te Fatu, e te Fatu, e hope paatoa i te tae i te basileia ra o te ao, o te taata râ i haapao i te hinaaro o tau Metua i te ao ra." Mataio 7: 21.

Nu. 5.

Me, 1913.

Mat. 6.

Teihea Ra te Parau Mau?

(TUATIRAA.)

TEIE te hinaaro matamua no te Atua ia tatou nei: ia faaroo tatou i te Atua, tei hamani i te taata nei i roto i to'na hoho'a mau, e ia Iesu Mesia ta'na i tonono mai."

"A faaitoito pae," parau maira te mau manihini.

Ei reira parau atura Tihare, "Tirara, teie te huru o te faaroo i hinaarohia, tei tauturu i te taata e parau i te mau taime atoa, 'Aore hoi au i haamâ i te evanelia a te Mesia ra, no te mea, o te mana ia o te Atua.' (Roma 1: 16.) Na roto i teie huru faaroo i ite ai tatou e, no te parau a te Atua na ao i hamanihia'i. No te faaroo hoi no Noa, a faaitetia mai ai ia'na e te Atua te mau mea aore â i itea maira, e roohia i hora e te mātā'u, i tarai ai i te pahia ora to'na fetii. No te faaroo i tae ai te tamarii a Iseraela na raro i te miti Uteute mai te mea ra e, e fenua pâpâmârô; no te faaroo i hi'a'i te aua i Ieriko; e mau mea e rau te huru i ravehia no te faaroo. Hebera 11. Ua tae mai teie huru faaroo na roto i te ite i te parau a te Atua, Roma 10:17, e no

te faaroo ore o te mau pîpî a Iesu aita ratou i manuïa i te tiavaru i rapae i te hoê lunati, Mataio 17: 14-20, e no reira e parau mau ta Paulo, ia parau oia e, 'Aore e faaroo ra, e ore roa oia (te Atua) e mauruuru.' O te faaroo i reira, o te tumu matamua ïa o te Evanelia. Eita e tia ia tatou ia haamori i te Atua, maori râ e faaroo to tatou e, te vai nei oia. E parau rahi roa te faaroo, area râ e mea faufaa ore te reira i te taata, mai te mea aore a'na e ohipa. Iakoba 2:14-17. Eiaha tatou e mana'o e, e roaa ia tatou te ora mure ore na roto i te faaroo ana'e, no te mea ua faaroo atoa hoi te mau demoni i te Atua, e ua rurutaina. Iakoba 2: 19. Mai te mea e taio outou i taua pene ra, e ite ai outou e, te faaroo ma te ohipa ore, e mea pohe ïa. 'Mai te tino nei hoi ia ore te varua ra, e mea pohe ïa, oia atoa te faaroo aore e ohipa, e mea pohe atoa ïa.' Eiaha tatou e mana'o e, e faaorahia tatou i te basileia o te Atua no te faaroo ana'e, no te mea ua parau atura te Mesia e, 'E ore te feia e parau mai ia'u ra e, E te Fatu, e te Fatu, e hope paatoa i te tae i te basileia ra o te ao, o te taata râ i haapao i te hinaaro o tau Metua i te ao ra.' Mataio 7: 21. Mai te mea e parau te hoê taata e, e pîpî oia na te Mesia e aita oia i mau maite i te parau na Iesu, te patoi nei taua taata ra i ta Iesu iho parau tei faaitehia i Ioane 8: 31. Ua parau atura Iesu e, 'Ua hinaaro outou ia'u ra, e haapao i ta'u parau.' " Ioane 14: 15.

"Aita anei teie parau i papaihia i te bibilia," parau maira te taote, "mai te mea e faaroo tatou i te Fatu ia Iesu Mesia, e ora ïa tatou?"

Ua parau atura Tihare, "Ua mana'o oe i te parau na Paulo, ta'na i parau atu i te tia i te fare tapearaa. Ua anihia teie mau pîpî e te tia i te fare tapearaa, eaha te mau mea e au ia'na, e ora'i oia i te basileia, e ua na ô atura Paulo raua o Sila ia'na, 'E faaroo i te Fatu ia Iesu Mesia, e e ora'i oe e to fetii atoa.' Ei reira ua a'o atura Paulo raua o Sila i te parau a te Atua i te tia tapearaa e to'na ra utuafare. Ua farii oia e to'na ra utuafare i te parau na Paulo

ma, e ua haapao ratou i te ture no te Ekalesia, no te mea ua faaroo ratou, e ua baptizohia ratou i reira. Ohipa 16: 31-33. Ua ite tatou na roto i teie nei hi'oraa e, e riro tatou ei feia rave i te parau nei, eiaha ei feia faaroo noa, i te haavarenoa-raa ia tatou iho." Iakoba 1: 22.

Ua na ô maira te haapii ture ia Tihare: "Teie te hoê irava tei papaihia i Roma, e te mana'o nei au e, eita paha e tia ia oe ia tatarara i te reira. Tera te irava: 'Ia fa'i hoi to vaha i te Fatu ra ia Iesu, e ia faaroo to aau e, ua faatia te Atua ia'na i te poheraa ra, e ora ia oe.' Roma 10: 9. Na roto i teie nei irava, ua tupu te mana'o e, e ora ia te taata i te faaroo ana'e. Eaha to oe mana'o?"

"Mai teie. Ua papaihia teie rata e Paulo i te mau taata, tei riro ei melo i roto i te Ekalesia, e no reira ua oti ia ratou te haapao i te mau ture matamua o te Evanelia, mai te faaroo, e te tatarahapa, e te baptizo te huru. E no te mea ua na reira ratou, ua noaa ia ratou te ora mure ore, mai te mea ua tamau â ratou i te faaroo. Ua ite papu Paulo i te paruparu o te taata nei, e no reira ua faaitoito oia i te Feia Mo'a i to'na anotau, ia fa'i to ratou vaha i te Fatu ra ia Iesu, e ia faaroo to ratou aau e, ua faatia te Atua ia'na i te poheraa ra, e ora ia ratou. Ua a'o atura Paulo i teie nei parau i te Feia Mo'a, tei ora i to'na anotau, e ere i te mau taata tei rapae i te Ekalesia i teie nei anotau hopea. Mai te mea râ, e haapao tatou i te ture no te Ekalesia, ei reira e fa'i noa i te Fatu na roto i te pure, e te haapao maitai, e ora'toa ia tatou."

"Ua maitai ta oe tatararaa," parau maira Barone, area râ nafea teie parau, 'O te tiaoro atoa hoi i te i'oa o Iehova ra, e hope roa ia i te ora.' Roma 10: 13. Teie te mau parau na Paulo i to te ao atoa nei, e ere ia i te mau melo ana'e no te Ekalesia i te tau no Paulo."

"Parau mau ta oe," te na reira'tura Tihare, "e tei te irava 14 e te 15 no taua pene ra te pahonora i ta oe uiraa. Tera te irava: 'Eaha ra te taata nei e tia'i ia tiaoro atu

HISTORIAN'S OFFICE

Church of Jesus Christ of Latter-day Saints

ia'na, i tei ore i faaroohia e ratou ra? e eaha hoi ratou e tia'i ia faaroo ia'na, i tei ore ratou i ite ia'na? e eaha hoi ratou e ite ai i te faaite ore? Eaha hoi te taata nei e tia'i ia faaite ia ore ratou ia tonohia? oia hoi tei papaihia ra e, O te nehenehe o te avae o te feia i hopoi mai i te parau oaoa o te hau e, o tei hopoi mai i te evanelia o te maitai ra e!' Na roto i teie nei pue irava, ua ite tatou e, 'Na te ite maori e noaa'i te faaroo, e na te parau a te Atua i parauhia maira te ite.' Mai te mea e faaroo mau to te taata, e ore roa oia e vai noa mai te haapao ore i te mau ohipa i hinaarohia e te Atua, oia hoi te mau ture no te Evanelia."

"Ua tano maitai ta oe tatararaa," parau maira Barone.

"E teie nei, e homa e," parau atura Tihare, "te parau faahou nei au e, o te faaroo, o te parau tumu ia o te Evanelia, area râ e ore roa tatou e faaorahia na roto i te faaroo ana'e."

"Mai te mea e farii tatou i te reira ei parau tumu mata-mua, eaha te parau tumu piti o te Evanelia?"

Ua parau atura Tihare: "Ia roaa ia tatou te faaroo, ei reira e tae mai ai te ite ia tatou e, e feia hara tatou, e te rave noa tatou i te mau mea au ore i mua i te mata o te Atua, e no reira e titau nei tatou i te mau mea e mauruuru ai oia ia tatou nei, e eaha teie titauroa maori râ te tatarahapa, oia hoi te parau tumu piti o te Evanelia a te Mesia. Ia haere maira Ioane Bapetizo i te poro-haere-raa i te Evanelia mau, ei na mua i te Mesia, e ua na ô atura oia, 'E tatarahapa outou, te fatata mai nei hoi te basileia o te ao.' Mataio 3: 2. Ia haere atura Iesu i Galilea i te parau-haere-raa i te parau maitai o te basileia o te Atua, ua na ô atura oia: 'Ua tae i te tau, te fatata mai nei te basileia o te Atua, a tatarahapa, a faaroo mai i te Evanelia nei.' Marko 1: 15. Ia maiti Iesu i ta'na mau pipi, ua tono atura oia ia ratou ia pii mai i te taata ia tatarahapa. Mareko 6: 7-12. Ua faa-ino atura oia i te mau oire i ravehia'i te rahi o ta'na ra mau semeio, no te mea aore ratou i tatarahapa." Mataio 11: 20.

(E tuatibia mai teie parau.)

Te Parau Tuatapapa no
Iosepha Semita.

(TUATIRAA.)

PENE XXXII.

MATAHITI 1839-40.

Ua parahi te Feia Mo'a i te oire ra, i Comerece, i muri a'era râ i parauhia, "Navu". E vahi ino roa ia. Te hoê mahana no te mau faaoraraa maere rahi. Haere atura te na Aposetolo e poro-haere i te Evanelia i Beritane. To ratou mau ohipa i taua fenua ra.

[A haere ê atura te Feia Mo'a i to ratou mau enemî i Missouri, e faaea i rotopu i te mau taata maitatai no Ilinoi, haamata a'era te hoê tau no te hau, e te oaoa no ratou, e faaitēhia ihora te mana rahi no te haapaoraa Moromona. O te taime hopea ia te reira i roto i te oraraa no te Peroppheta, i tia'i ia'na ia tauturu atu, e ia haamaramarama'tui te mau taeae e te mau tuahine, mai te ore i haapeapeahia e te enemî. Te tupu noa ra te Ekalesia i te rahiraa, e ua rau te tausani o te mau taata o tei farii mai i te parau mau, e te parahi noa ra ratou i Amerika e i Beritane atoa hoi.

I te mahana 1 no Me, 1839, hoo maira Iosepha i te hoê tufaa fenua i te oire nainai ra, i Comerece, i te hiti o te anavai ra, o Misisipi. E fenua pape e te vari ia te reira, e no reira e fenua ma'i, area râ e vahi nehenehe roa, e i muri iti a'era, ua faaorehia te i'oa "Comerece", e mairihia ihora te i'oa ra, o "Navu", i nia iho. E hoê ahuru mahana i muri a'e i te reira, ua afai maira Iosepha i to'na utuafare i reira, e haamata ihora te mau Feia Mo'a i te haaputuputu mai e patu i te hoê oire.

Ua hoohia te tahi fenua i tera pae no te anavai i te fenua ra, i Iowa, e haere maira o Birikama Youne, e te tahi atu â Feia Mo'a, e parahi ihora ratou i reira. Ua paruparu roa te Feia Mo'a no to ratou hamani-ino-raa-hia i mua'e i te

reira, e aita i mahia i roohia'i ratou paatoa e te ma'i ino roa. Ua roohia'toa o Iosepha no te mea, no ta'na tauturu-noa-raa'tu i te feia ma'i, ua paruparu roa to'na ihora tino. I te 22 no Tiurai, tia maira te Peropheta, mai to'na roi mai, e i roa ihora oia i te Varua o te Atua. Haere atura oia i rotopu i te feia ma'i, e teie te tahi ohipa ta'na i rave i taua mahana ihora. Te na ô maira o Virifora Vudurufa, o tei hi'o noa ia Iosepha i reira:

“E rave rahi te mau taata, tei roohia e te ma'i, i te hiti o te anavai, e haere atura Iosepha i te fare no Sidine Riti-done, e faaora noa ihora i te mau taata ma'i, ta'na i farerei i to'na haerea. Tei rotopu ia o Henere G. Sherwood ia ratou, e ua fatata roa oia i te pohe. Ua tia Iosepha i te opani no to'na tiahapa, e faaue atura oia ia'na, i roto i te i'oa no Iesu Mesia, ia haere mai i rapae i to'na tiahapa, e haapao a'era oia, e ora roa ihora. Te pohe noa ra o Beniamina Barone, e ua paruparu roa to'na utuafare paatoa, e faaora atura Iosepha ia ratou i roto i te i'oa o te Fatu. E faaorahia a'era te feia ma'i paatoa, tei parahi i nia i te hiti o te anavai, parauhia ihora o Hebera C. Kimebela, e te tahi atu mau taeae, ia amui mai i te Peropheta, e haere atura ratou i tera pae mai no te anavai e farerei i te feia ma'i i te oire ra, i Monatarose. Tei rotopu ia te tahi na Aposetolo ia ratou, e ia tae atura ratou i Monatarose, haere tia'tura i te fare no Birikama Youne, te Peresideni no te pūpū ahuru ma piti Aposetolo, o tei pohe i te ma'i, e faaora ihora te Peropheta ia'na. Ua tia maira oia i nia, e amui a'era ia Iosepha ma i te farerei atu i te feia ma'i. Ua haere ratou i te na utuafare no Vilifora Vudurufa, e Oresoni Haede, e Ioane Tela, e pee atura ratou i te Peropheta, ei reira haere atura ratou i te fare no Elia Foradama, o tei fatata roa i te pohe. E tomo a'era ratou i roto i to'na piha, haere atura te Peropheta na te Atua i pihaiho ia'na, e rave ihora i to'na rima atau, e paraparau atura oia ia'na. Aita i tia ia Foradama ia parau, e ua huru ê to'na na mata, mai te mea ra e, ua pohe roa oia.

Ua hi'o noa o Iosepha i roto i to'na mata, e muri iti a'era, ua huru maitai rii oia. Ui atura Iosepha ia'na e: 'Te ite mai nei anei oe ia'u?' E pahono maira oia: 'E.' Na ô atura Iosepha e: 'E faaroo anei to oe ia faaorahia?' Pahono maira oia: 'Aita paha i teie nei; ahiri i tae mai oe i nauanei, e faaroo to'u ia faaorahia.' Parau atura Iosepha e: 'Aita anei oe i faaroo ia Iesu Mesia.' Na ô maira oia e: 'Te faaroo nei au ia'na.' Tia noa ihora Iosepha i te tahi maa taime rii, ei reira parau u'ana'tura oia, ma te re'o puai roa, i te na ôraa'tu e: 'Foradama, to'u taeae, te faaue atu nei au ia oe, i roto i te i'oa o Iesu Mesia, ia tia mai i nia nei, e ia faaorahia.' Mai te re'o o te Atua ia to'na re'o, e aueue ihora te fare. Ua tia maira o Elia Foradama i nia i taua taime ihora, e ora roa ihora oia. Tei nia iho i to'na na avae te tahi raau, e iriti ihora oia i te reira, e ia faaahuhia oia, amu a'era i te tahi faraoa, e te û, e pee atura oia i te Peropheta i roto i te purumu. Ua haere ratou paatoa i te fare no Iosepha Bate Nobeles, o tei pohe atoa i te mai, e faaorahia ihora oia e te Peropheta. I teie nei râ, i faaroo ai te mau taata iino i taua mau mea i ravehia ra; e haere atoa'tura ratou i te fare no Nobeles. E faaorahia a'era Nobeles, tuu atura ratou i to ratou mau turi i raro, e pure atura i te Atua, o Foradama ia te auvaha no ratou, e a pure atu ai oia, ua mairi ihora oia i nia i te tahua. Ua tia Iosepha i nia, e hi'o atura oia i te mau taata i roto i te fare, e ite ihora oia i te tahi mau taata faaroo ore, e faaue atura oia ia ratou ia haere atu i rapae. E haere a'era ratou i rapae, ara faahou maira Foradama, e faaoti ihora i ta'na pure.

I muri iti a'e i teie mahana rahi no te faaoraraa, haere atura te mau Aposetolo e poro-haere i te Evanelia i Beritane. Ua haamata o Hebera C. Kimebela i te reira ohipa i taua fenua ra i te matahiti 1837, ua ho'i maira râ oia i te matahiti i muri iho, e maitihia ihora o Viriadi Ritedi ia faatere i taua ohipa ra i reira. E mea aroha rahi roa to ratou haereraa no te mea te pohe noa ra to to ratou utuafare i te ma'i,

e haere atura ratou atoa ma te tino paruparu, e te moni ore; e faaroo puai roa râ to ratou, e tiaturi noa ihora ratou i te Fatu ia tauturu mai ia ratou ra.

I te mahana hoê no Tiurai, haere atura Iosepha, e ta'na na tauturu, i tera pae mai no te anavai ra, no Misisipi, i te fenua ra, i Iowa, e haapao ihora i te hoê pureraa no te mau Aposetolo. Ua haamaitai Iosepha ia ratou no to ratou tere, e a'o atura oia i te tahi parau, na nia i to ratou ohipa, e haapapû ihora i te mau mea hanahana e rave rahi no te Basileia o te Atua.

E hoê hebedoma i muri a'e, haere atura o Ioane Tela raua o Vilifora Vudurufa e poro-haere i te Evanelia. Te pohe noa ra Vilifora e ta'na vahine atoa i te ma'i, area râ haamaitai atura oia ia'na, e haere atura, mai te amuamu ore. Ua huru maitai o Ioane Tela i te haamataraa o to ratou tere, aita râ i mahia, i roohia'i oia e te ma'i, e aita noâ to'na e moni, aore roa oia i feaa, e faautua maira te Atua ia'na no to'na faaroo. Ia tae atura oia i Niu Ioka, e hoê noâ iho peni to'na, e hinaaro ihora te tahi mau taeae i reira, i te horoa mai i te tahi moni na'na, ia haapee atu i ta'na tarahu na nia i te pahi, aita râ oia i hinaaro i te reira, e parau atura oia e, e faaineine te Atua i te ravea na'na. I mua'e i to ratou faarueraa i Amerika, ua horoahia maira te moni, e navai i te haapee atu i ta'na tarahu na nia i te pahi, e ta te hoê atu taeae atoa hoi.

Ua haere tiamâ ê atura o Pare P. Paraita i te fare auri, na roto i te tautururaa mai o to'na tuaana ra, o Oretoni Paraita, e i te mahana 29 no Atete, faarue atura raua i Navu. I te 18 no Setepa, haere atura o Birikama Youne, aita râ i tia ia'na ia haere na raro, maori râ ia tauturuhia oia, e vaiiho ihora oia i ta'na vahine i pohe i te ma'i, e te hoê aiû apî roa. Amuihia a'era oia e Hebera C. Kimebela, o tei vaiiho atoa i ta'na vahine e te mau tamarii, e te pohe noa ra ratou atoa i te ma'i, maori râ te hoê noa iho tamarii, e e toru mahana i muri a'e i te reira, haere atoa'tura o Tihoti A.


Semita, e vaiiho ihora oia i to'na na metua paruparu roa.

Ua rave ratou i te ohipa hanahana rahi roa i te fenua ra, i Beritane. Ua faatoroahia o Viliadi Ritedi ei Aposetolo, i te 14 no Eperera, 1840, ei reira ua riro ia e vau Aposetolo tei rave noa i te ohipa i roto i taua fenua ra.

I roto i te hoê matahiti e tiahapa, ua neneihia e 5,000 Buka a Moromona; e 3,000 buka himene, e e 50,000 parau evanelia. Haamata ihora ratou i te nenei i te hoê vea, i parauhia, "Te Fetia Mileniala," e o Pare P. Paraita ia te faaaau parau. Ua amui mai e 3,000 taata e tiahapa i te Ekalesia, e ua poro-haere-hia te Evanelia i roto i te na fenua ra, i Beritane, e i Sotalana, e i Irelana, e i nia i te hoê motu, i parauhia, "Mana". E oti a'era to ratou ohipa i reira, ho'i maira ratou ma te oaoa rahi roa, e mai te haamaitai noa'tu i te Atua ra.

—OLE PETESONA.

(E tuatihia mai teie parau.)



TE HOE FARE TAHITO I TE FENUA PAPAA.

Te Mau Parau Api.

I TE oire ra, i Savana, i Amerika, ua pohe te hoê vahine ereere, e o to'na poria te tumu i pohe ai oia. E pae avae a'enei e 70 kilo ia to'na faito, e i roto i teie nei na avae e pae, ua haere to'na faito i te rahi, e tae roa e 285 kilo; pohe roa'tura oia no te poria rahi.

I Niu Ioka ua pohe roa te hoê taata no Italia; no to'na ite ore i te re'o Beritane te tumu i pohe ai oia. Ua huru mauui oia, e ua rave oia i te hoê mohina raau i faatapaohia ei mea taero roa, e ua inu oia ma te mana'o e, e raau maitai te reira. E pae minute i muri iho ua pohe roa oia.

Te pahi ra o Tahiti, o tei faarue i te fenua ra o Takaroa, i te 15 no Eperera i mairi a'enei. Ua tere tia oia i Takapoto, e ua tae oia i te hopea i raro no Takaroa i te pô. Ua farerei mai ia'na te hoê puahiohio, e ua huri taua pahi ra, e moe roa'tura, e aita i itea mai, area te mau taata, ua tae ia i uta na nia i te mau raau e te hoe no te boti.

I roto i to tatou vea no Eperera ua faaitiehia te tahi mau ati rahi tei tupu i Amerika, e i te poheraa o te mau taata e rave rahi. I muri iho i taua mau ati ra, ua anihia te mau mataeinaa no te hau Amerika e tauturu mai i taua mau taata i roohia i te ati ra. I teie nei, ua tauturuhia taua mau taata ra i te paeau no te ahu, e te maa, e te moni atoa hoi, e na to matou iho vahi, oia hoi o Utaha, i horoa'tu i taua mau taata ra e 10,000 dara.

Te faaineine nei te hoê pahi reva (pahi reva opupu) e reva mai, mai te mau motu rii i faatata i te fenua ra i Afarika, oia hoi, te mau motu i parauhia o Canary; e te mana'o nei e tapae mai taua pahi reva ra i Amerika. Tera hoi te i'oa o taua pahi ra, o Suchard, e tei nia ia'na e toru noa iho taata. Te rave nei ratou te maa e te pape e au no e piti aburu e ma pae mahana. Ua ineine roa ratou e reva e hoê avae a'enei e ia tae mau i te hora no te revaraa, inaha ua pau te mata'i (gas) i roto i te opupu. Te tumu ia i pau ai te mata'i, na te hoê taata haapao ore i taviri i te robini mata'i.

Ua pohe te hoê ona tuiroo rahi roa no Amerika o J. Pierpont Morgan to'na i'oa. Ua parauhia o oia te Arii moni no Amerika. Ua pohe oia i Roma e te mana'o nei e faautahia mai to'na tino na nia te hoê pahi manuâ no Italia. Aita hoi i iteahia te rahi o to'na moni, area râ ua mana'ohia ua roaa ia'na e hoê hanere o te milioni dara. Na roto i te poheraa o teie nei ona, e mea nehenehe ia haamana'o tatou e, e tae mai te pohe i nia ia tatou atoa; te feia ona e te feia vêvê, te feia parau-tia e te feia parau-tia ore. Ua na ô ra o Isaia e "E aihere mau â te taata nei", e na Davida i faaite mai e, mai te aihere to tatou tupuraa i te poipoi e i te ahiahi ua tâpûhia, e ua oriorio atura.

Tei te hoê oire rahi no Amerika, o Philadelphia, e na vahine e piti, e e na mutoi raua. Ua faataahia raua e ua faatapaohia i te tapao fetia, ei tapao no te mutoi. E tia ia raua i te rave i te mau peu atoa o te mau mutoi tane, e te afai nei raua i na pupuhi poto i roto i to raua pute pereue.

Aita roa i hau te orure hau i Mexico, e tei roto â taua fenua ra i te peapea rahi. I roto i te vea no Mati ua faaite matou i te taparahi-raa-hia o te Peresideni no taua fenua ra. Te tama'i noa ra to taua fenua ra e i te 23 e te 24 no Mati ua pohe roa e piti hanere e ono ahuru e ma iva taata; te pae rahi o teie nei mau taata no te pae ia o te orure hau.

Ua oti a'enei te hoê ture apî i te mau mataeinaa e rave rahi i Amerika. Te na ô mai nei taua ture apî ra e, "Eiaha te mau taata apî, te tane e te vahine, e puhipuhi i te avaava, e ia puhipuhi te taata, o tei ore i tae i to'na matahiti e 21, e faautuahia oia." Mai te au i te ture, e tia ia faautuahia te mau taata haapao ore i taua ture apî ra, e 100 dara, e e faautua-atoa-hia te fare toa, o tei hoo mai i te avaava i te taata apî.

I roto i Eperera ua fatata roa te arii no Paniola i te pohe. A haere mārû ai oia na nia i ta'na puaahorofenua, ua ou'a mai te hoê taata ino, haru atura i te tavaha o te puaahorofenua, e ua pupuhi tia'tu oia i te ouma o te arii. No te mātā'u o te puaahorofenua ia haru mai te taata i te tava-ha ou'a te puaahorofenua i nia, e ua tano te ofai i te arapoa o te puaahoro-fenua; ora'tura te arii. Aita roa te arii i ino maoti râ ua paapaa rii to'na tapura rima i te paura.

No ite a'enei te peapea rahi, mai tei tupu i teie na avae tei mairi i muri; e te haamana'o nei tatou i te hoê irava parau, o tei na ô maira e, "E e ati rahi to te mau fenua i te ao nei, e te ahoaho; e te miti e te are i te harururaa; e te tarapaperaa o te aau taata i te mātā'u, e te mana'oraa i te mau mea e fatata i te tupu i te ao nei." I teie nei tau avae, ua nanai matou i te mau ati e rave rahi tei tupu, o te mau tama'i e te parau tama'i. I roto i te avae Ditema, ua roohia te mau motu i Philipine e te hoê puahio-hio, e ua pohe atura e 1000 e tiahapa o te taata. I roto i Setepa, ua hanere te taata i pohe i Iapone i te hoê vero rahi, e ua pau te faufaa, e noaa e piti ahuru milioni dara; i taua vero ihora, ua pohe e rave rahi te taata i tahatai i te fenua Tinito. I te 20 no Novema, roohia ihora o Jamaica i te miti rahi, e te mata'i, e ua tomo roa e rave rahi te pahi, e ua mou roa e na oire nehenehe. I roto i te avae Tiurai, ua pau roa te oire ra, o Regina, i Canada, i Amerika, e ua pohe e na hanere taata. I muri iho rii i te reira, ua roohia te pae apatoerau no Niu Ioka i te hoê puahiohio, pohe atura e rave rahi te taata. I na mahana i muri iho i te reira, ua pohe roa e 80 taata i Ilinoi i te vero rahi. E i teie mau avae, ua tausani te mau taata i pohe, mai tei faaitehia i roto i te vea no Me.

Ua baptizohia te hoê tamaiti taeahia i te matahiti i te amaa, i Taka-roa, e te rave-itoito-hia ra te ohipa haapiiraa tamarii i reira e to tatou tau orometua, o Lui e o Monatarose. Te rave-itoito-atoa-hia ra te ohipa haapiiraa tamarii i Hikueru e to tatou orometua, o Ora.

Ta tatou Eperera i faatiahia i te fenua ra, i Hao, ua hau ê ia i te maitai, e te hau, e te peapea ore, tei iteahia mai, e ua baptizohia e piti tau tamarii i taeahia i te matahiti. Ua faaoti-atoa-hia te fare pureraa apî i reira, e ua tomohia i te 9 no Eperera. O te hoê ia orôa nehenehe rahi.

E peu huru ê roa ta te hoê taata i Lonedona i Beritane. I te poheraa o ta'na vahine, ua faaue oia ia taninahia to'na tino i te auahi e ua na reira ia; ia oti i te reira, ua haapue oia i te rehu o to'na tino, hopoi atura i te tahi mau taata paari ia iritihia te auri no roto mai i taua mau rehu. Ua iritihia hoi te auri na roto i te hoê mau ravea paari, e ua roaa mai te auri mai te poe nainai te huru, e te rave noa ra taua taata ra i taua auri ei ofai no to'na tapea rima. Te vai atoa te hoê vahine tuiroo i Beritane o tei afai haere i te mau rehu o ta'na tane, i pohe, i roto i to'na pute pereue i te hoê afata iti. E ua parauhia ia pohe taua vahine ra, e taninahia to'na tino, e e anohia to raua mau rehu, oia hoi te mau rehu o te tane e te vahine.

E maoro rii a'enei ua tupu te hoê peapea rahi i Beritane, e tera hoi te tumu, te hinaaro nei te mau vahine i taua fenua ra e, ia faatiahia mai ratou ia maiti atoa i roto i te mau maitiraa no te hau i te mau taata toroa no to ratou fenua, ei faatere i nia iho ia ratou. I teie nei, tei te mau tane ana'e te maitiraa. Aore te pae rahi no te feia toroa e faatia e, ia maiti atoa te mau vahine, te tahi ia pae o te feia toroa e faatia ia maiti atoa te mau vahine. Ua parauhia te tumu aore te mau vahine e faatiahia ia maiti atoa ratou, e riro ratou i te teoteo. E no reira ua faatupu taua mau vahine ra i te peapea rahi, e ua tama'i atu ratou i te mau feia toroa o te ore e faatia i to ratou mau hinaaro. Ua faaino-roa-hia te ohipa o te feia toroa e ratou, e ua pararî roa te tahi mau fare, e na taua mau vahine ra i tupararî roa i te mau hi'o haamaramarama i te mau fare hau, e e rave rahi atu â te ohipa e au i te maamaa i ravehia e taua mau vahine ra. E teie nei, no te ohipa haamâ e te maamaa ta taua mau vahine i rave, ua mana'o ihora te mau feia toroa e mea maitai roa, eiaha te mau vahine e faaô i roto i te ohipa maitiraa. E rave rahi roa o taua mau vahine tei tapeahia ia i roto i te fare auri.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.